

欽定元史

卷之十
一八八七

元史卷七十八

明翰林學士亞中大夫知制誥兼修國史宋

濂等修

輿服志第二十八

輿服一

若稽往古黃帝堯舜垂衣裳而天下治蓋取諸乾坤服牛乘馬引重致遠蓋取諸大壯冕服車輿之制其來尚矣虞書舜作十二章五服以命有德車服以賞有功禮記虞鸞車夏鉤車商大輅至周損益前代弁師掌王之五冕巾車掌王之五輅而儀文始備然孔子論治天下之大法於殷輅取其質而得中周冕取其文而得中也

至秦併天下兼收六國車旗服御窮極侈靡有大駕法
駕以及鹵簿漢承秦後多因其舊由唐及宋亦效秦法
以爲盛典於文質適中之義君子或得而議焉元初立
國庶事草創冠服車輿並從舊俗世祖混一天下近取
金宋遠法漢唐至英宗親祀太廟復置鹵簿今攷之當
時上而天子之冕服皇太子冠服天子之質孫天子之
五輅與腰輿象轎以及儀衛隊仗下而百官祭服朝服
與百官之質孫以及於士庶人之服色粲然其有章秩
然其有序大抵參酌古今隨時損益兼存國制用備儀
文於是朝廷之盛宗廟之美百官之富有以成一代之

制作矣作輿服志而儀衛附見于後云

冕服

天子冕服衮冕制以漆紗上覆曰緹青表朱裏緹之四周匝以雲龍冠之口圍縈以珍珠緹之前後旒各十二以珍珠爲之緹之左右繫黹纁二繫以玄統承以玉瑱纁色黃絡以珠冠之周圍珠雲龍網結通翠柳調珠緹上橫天河帶一左右至地珠鈿窠網結翠柳朱絲組二屬諸笄爲纓絡以翠柳調珠簪以玉爲之橫貫於冠○衮龍服制以青羅飾以生色銷金帝星一日一月一昇龍四複身龍四山三十八火四十八華蟲四十八虎雌

四十八○裳制以緋羅其狀如裙飾以文繡凡一十六行每行藻二粉米一黼二黻二○中單制以白紗絳緣黃勒帛副之○蔽膝制以緋羅有標緋絹爲裏其形如襜袍上着之繡複身龍○玉珮珩一琚一瑀一衝牙一璜二衝牙以繫璜珩下有銀獸面塗以黃金雙璜夾之次又有衡下有衝牙傍別施雙的以鳴用玉○大帶制以緋白二色羅合縫爲之○玉環綬制以納石失金錦也上有三小玉環下有青絲織網○紅羅韠制以紅羅爲之高勒○履制以納石失有雙耳二帶鉤飾以珠○韞制以紅綾

右按太常集禮至元十二年十一月博士議擬冕天
版長一尺六寸廣八寸前高八寸五分後高九寸五
分身圍一尺八寸三分并納言用青羅爲表紅羅爲
裏周迴緣以黃金天板下四面珠網結子花素墜子
前後共二十有四旒以珍珠爲之青碧線織天河帶
兩頭各有珍珠金翠旒三節玉滴子節花全紅線組
帶二上有珍珠金翠旒玉滴子下有金鐸二梅紅繡
欵幔帶一黹纈二珍珠垂繫上用金萼子二簪窠欵
幔組帶鈿窠各二內組帶窠四並鏤玉爲之玉簪一
頂面鏤雲龍袞衣用青羅夾製五采間金繪日月星

辰山龍華蟲宗彝正面日一月一升龍四山十二上

下襟華蟲火各六對虎雉各

關

對背星一升龍四山

十二華蟲火各十二對虎雉各六對中單用白羅單

製羅領襟襖裳一帶襟襖全紅羅八幅夾造上繡藻

粉米黼黻藻三十三粉米十六黼三十二黻三十二

蔽膝一帶襟襖紅羅夾造八幅上繡升龍二綬一幅

六采織造紅羅托裏小綬三色同大綬銷金黃羅綬

頭全上間施二玉環並碾雲龍緋白大帶一銷金黃

帶頭鈿窠二十有四紅羅勒帛一青羅抹帶一佩二

王上中下璜各一半月各二並碾玉爲雲龍文玉滴

子各二並珍珠穿造金篋鉤獸面水葉環釘全涼帶
一紅羅裏鏤金爲之上爲玉鶯七撻尾束各一金攀
龍口玳瑁襯釘烏一重底紅羅面白綾托裏如意頭
銷金黃羅緣口玉鼻人飾以珍珠金緋羅錦襪一兩
○大德十一年九月博士議唐制天子袞冕垂白珠
十有二旒以組爲纓色如其綬黻續充耳玉簪導玄
衣纁裳凡十二章八章在衣日月星辰山龍華蟲火
宗彝四章在裳藻粉米黼黻標領爲升龍皆織成之
龍章以下每章一行每行十二白紗中單黼領青標
襪裾黻加龍山火三章毳冕以上火山二章繡冕山

一章玄冕無章革帶大帶玉佩綬襪與上同烏加金飾享廟謁廟及朝遣上將征還飲至踐祚加元服納后元日受朝及臨軒冊拜王公則服之又宋制天子服有袞冕廣尺二寸長四寸前後十有二旒二纁並貫珍珠又有珠旒十二碧鳳銜之在珠旒外冕板以龍鱗錦表上綴玉爲七星傍施琥珀餅犀各二十四周綴金絲網鈿以珍珠雜寶玉加紫雲白鶴錦裏四柱飾以七寶紅綾裏金飾玉簪導紅絲條組帶亦謂之平天冠袞服青色日月星山龍雉虎雌七章紅裙藻火粉米黼黻五章紅蔽膝升龍二並織成間以雲

彩飾以金釵花鈿窠裝以珍珠琥珀雜寶玉紅羅襦裙繡五章青襍襪裾六采綬一小綬三結三玉環三

素大帶朱裏青羅四紳帶二繡四紳盤結

授帶飾並同衮服

白帶中單青羅袷帶紅羅勒帛鹿盧玉具劔玉縹首鏤白玉雙佩金飾貫珍珠金龍鳳革帶紅鞵赤舄金釵花四神玉鼻祭天地宗廟受冊尊號元日受朝冊皇太子則服之事未果行至延祐七年七月英宗命禮儀院使八思吉斯傳旨令省臣與太常禮儀院速製法服八月中書省會集翰林集賢太常禮儀院官講議依秘書監所藏前代帝王袞冕法服圖本命有

司製如其式

鎮圭制以玉長一尺二寸有袋副之

皇太子冠服○衮冕○玄衣○纁裳○中單 蔽膝○玉佩○大綬○朱韉○赤舄

按太常集禮至元十二年博士擬衮冕制用白珠九旒紅絲組爲纓青纁充耳犀簪導青衣朱裳九章五章在衣山龍華蟲火宗彝四章在裳藻粉米黼黻白紗中單青標襜裙革帶塗金銀鉤鑠蔽膝隨裳色爲火山二章瑜玉雙佩四采織成大綬間施玉環三白韉朱舄舄加金塗銀釧大德十一年九月照擬前代

制度唐制皇太子衮冕垂白珠九旒紅絲組爲纓青
纁充耳犀簪導玄衣纁裳九章五章在衣龍山華蟲
火宗彝四章在裳藻粉米黼黻織成之每行一章黼
黻重以爲等每行九白紗中單黼領青襟襪裾革帶
金鈎釧大帶蔽膝隨裳色火山二章玉貝劔金寶飾
玉纁首瑜玉雙佩朱組帶大綬四采赤白纁紺純朱
質長丈八尺首廣九寸小雙綬長二尺六寸色同大
綬而首半之間施玉環三珠鞞赤舄加金飾侍從祭
祀及謁廟加元服納妃服之宋制皇太子衮冕垂白
珠九旒紅絲組爲纓青纁充耳犀簪導青衣朱裳九

章五章在衣山龍華蟲火宗彝四章在裳藻粉米黼黻白紗中單青襟襪裙革帶塗金銀鈎黼蔽膝隨裳衣火山二章瑜玉雙佩四采織成大綬間施玉環三白鞵朱舄舄加塗金銀飾加元服從祀受冊謁廟朝會服之已擬其制未果造

三獻官及司徒大禮使祭服○籠巾貂蟬冠五青羅服

五

領袖襪俱用皂綾

紅羅裙五

皂綾爲襪

紅羅蔽膝五

其羅花樣俱係牡丹

白

紗中單五

黃綾帶

紅組金綬紳五

紅組金譯語言納石失各佩玉環二

象笏

五銀束帶五玉佩五白羅方心曲領五赤革履五對白

綾鞵五對

助奠以下諸執事官冠服○貂蟬冠獬豸冠七梁冠六

梁冠五梁冠四梁冠三梁冠二梁冠二百青羅服二百

領袖襴俱用皂綾

紅綾裙二百

皂綾爲襴

紅羅蔽膝二百紫羅公服

二百

用梅花羅

白紗中單二百

黃綾帶

織金綬紳二百

紅一百九十八

青二各佩銅環二

銅束帶二百白羅方心曲領二百銅佩二百

展角幘頭二百塗金荔枝帶三十烏角帶一百七十皂

鞞二百對赤革履二百對白綾鞞二百對象笏三十銀

杏木笏一百七十

凡獻官諸執事行禮俱衣法服惟監察御史二冠獬

豸服青綬凡迎香讀祝及祀日遇陰雨俱衣紫羅公

服六品以下皆得借紫

都監庫祠祭局儀鸞局神厨局頭目長行人等○交角幘頭五十窄袖紫羅服五十塗金束帶五十皂鞢五十對

初憲宗壬子年秋八月祭天於日月山用冕服自此始成宗大德六年春三月祭天於麗正門外丙地公獻官以下諸執事各具公服行禮是時大都未有郊壇大禮用公服自此始九年冬至祭享用冠服依宗廟見用者制其後節次祭祀或合祀天地增配位從祀獻攝職事續置冠服於法服庫收掌法服二百九

十有九公服二百八十窄紫二百九十有五至大間
太常博士李之紹王天祐疏陳親祀冕無旒服大裘
而加袞裘以黑羔皮爲之臣下從祀冠服歷代所尚
其制不同集議得依宗廟見用冠服制度

社稷祭服○青羅袍一百二十三白紗中單一百三十
三紅梅花羅裙一百二十三藍織錦銅環綬紳二紅織
錦銅環綬紳一百一十七紅織錦玉環綬紳四紅梅花
羅蔽膝一百二十三革履一百二十三白綾襪一百二
十三白羅方心曲領一百二十三黃綾帶一百二十三
佩一百二十三銅珩璜者一百一十九玉珩璜者四藍

素紵絲帶一百二十三銀帶四銅帶一百一十九冠一百二十三水角簪金梁冠一百七紗冠一十獬豸冠二籠巾紗冠四木笏一百二十三紫羅公服一百二十三黑漆幘頭一百二十三展角全二色羅插領一百二十三鍍金銅荔枝帶一十角帶一百一十三象笏一十三枝木笏一百一十枝黃絹單包複一百二十三紫紵絲抹口青羶韞一百一十三皂鞞一百二十三窄紫羅衫三十黑漆幘頭三十銅束帶三十黃絹單包複三十皂鞞三十紫紵絲抹口青羶襪三十

宣聖廟祭服○獻官法服○七梁冠三簪鴉青袍三絨